

2PE - Tolysh Bible

65001 - Unicode (UTF-8)

CAP Information: checked/corrected 2009 HAB

2 PETER

Peteri Diminə Nomə

2 Peter

PETERİ DIMİNƏ NOMƏ

VƏSƏ

«*Peteri Diminə Nomə*» bə sıftənə imoniyon nıvıştə bıə. Peter bı nomədə pesoxtə təlimi pevilo kardə mıəllimon iyən çəyo omə bə bevəcə əməlon vəynə mıborizə bardeydə. In işkili cəvob çe Xıdo iyən Rəbb İsa Məsihi əsl təlimi zıneye. İsa Məsihi şəxsən zınə iyən Çəy təlimi məsəkəson ın təlimi bə odəmon səhey rosniye bəzınen.

Peteri fikro, Məsihi zuhur bə səbəb bə di dəqıneydə ki, Xıdo «piyeydəşe odəmon tobə bıkən, piyeydəşni əvon həlok bıbun» (3:9).

Kitobi məzmun:

1:1-21 Səlom vığandey iyən imoniyon dəvət

2:1-22 Pesoxtə təlim pevilo kardəkəson aqıbat

3:1-13 Rəbbi Ruj

3:14-18 Nəsyəton

1

¹ İsa Məsihi ğul iyən həvari az Simon Peteriku səlom bıbu bəşmə imoniyon. Şımə deyəmə bə ico deçəmə Xıdo iyən Xıloskor bıə İsa Məsihi salehəti hımhımbədə bə ğıymətınə imoni soyb bıəşon! ² Bıdə de Xıdo iyən deçəmə Rəbb İsa Məsihi dərk karde vositə bəşmə bol-boli lutf iyən sulh doə bıbu!

İsa Məsihi dumo şeyro dəvət

³ Əy Deştə ilahiye ğudrəti boçəmə jıyey iyən momin beyro lozim bıə har çiy bəmə bəxş kardışe ki, əməni Bəştə izzəti iyən alicənobəti Dəvətkardəkəsi dərk bıkəmon. ⁴ Əy bəmə vey yolə iyən dəqərinə vədon doşe. Deçımon vositə dınyoviyə orzuyonku, bevəcə əməlonku diyəro bıbən bə ilahiye təbiəti xanboz bıbən. ⁵ Jıqonə, şımənən deştə həmə cəhdi bəştə imoni alicənobəti, bə alicənobəti zıney, ⁶ bə zıney nəfsi hakim bey, bə nəfsi hakim bey durum, bə durumi mominəti, ⁷ bə mominəti dustiyəti iyən bə dustiyəti mikəmmələ mehıbbət əlovə bıkən. ⁸ Ehanə ın xısusiyəton bəşməku bıbon iyən imon ziyodə beydəbon, çəmə Rəbb İsa Məsihi dərk kardeydə befəoliyət iyən besəmərə beyku şıməni nığo bəkarde. ⁹ In xısusiyəton kiku nıbon, əv kuye, diyəro vindey əzını iyən yodo bekardeşe ıştə sıftənə qınoku təmiz bey.

¹⁰ De jıqoy ha çımı imoniyə boon, ıstə dövət kardə bey iyən səçin kardə bey təsdığ kardeyro həniyən həkəm bımandən, ehanə ımı bıkon, hiç vaxti dənıbəqıjeyon.

¹¹ Jıqonə, bəçəmə Rəbb iyən Xıloskor bıə İsa Məsihi zolə Podşoəti dəşe həx bəşmə bol-boli doə bəbe.

¹² Bı səbəb az hejo imoni bəşmə yod vardeydəm, hərçənd şımə imoni zıneydon iyən ıstə soyb bıə həğigətədə sabitgədəmiyon. ¹³ Az bı andomədə jiyə mıddətədə imoni bəşmə yod vardey iyən şıməni çəşnavi kardey səhey hisob kardeydəm. ¹⁴ *Oxo az zıneydəm in andomi tərğ kardeyro bomı vaxt həni neze, çəmə Rəbb İsa Məsihi oşko kardışe ımı bəmı. ¹⁵ Bı səbəb dastpoçə beydəm ki, az ın dınyo tərğ karde bəpeştən şımə hejo imoni bə yod biyənen.

İsa Məsihi yolə izzət

¹⁶ Əmə Rəbb İsa Məsihi ğudrəti iyən zuhuri bəşmə bəyon kardeədə pesoxtə bıə əfsonon əsos nıqətimone. Əmma Bəçəy yolyəti əmə ıstən şoyd bımon. ¹⁷ *Əy izzət iyən şərəf ğəbul kardışe Pıə Xıdoku, Yolə Ehtişom Soybiku jıqo qıləy sədo oməy Boəy: «Im Çımı azizqıromiyə Zoəy, Çəyku rozim». ¹⁸ Əmənən məsəməne osmono omə ın sədo, mığəddəsə bandədə Deəy ivirədə beədə.

¹⁹ Im əməni həniyən vey əmin kardeydə ki, peyğəmbəron sıxanon bə vırə rəsəyn. İmon toykiyə vırədə bə şəvəx jə çoy oxşeydən. Maştəvo rujobə astovə bəşmə dılon pemencə bı sıxanon dığğət kardeydonbo, çok kardeydon. ²⁰ Har çıysə bənav ımı zınəninişon ki, Mığəddəsə Nıvıştəyonədə bıə peyğəmbərəti sıxanon hiç qıləyni peyğəmbəri ıstənıku oməni. ²¹ Oxo peyğəmbərəti kardey hiç vaxti de insoni irodə bıəni, intasi de Mığəddəsə Rufi vositə səbəro kardə bıə insonon Xıdoku omə sıxanon votəşone.

2

Pesoxtə təlim pevilo kardəkəson aqibət

(Yəhd.3-16)

¹ Əmma İsrail xəlği arədə duyəvoje peyğəmbəronən hestbin, jəqoən şımə arədən pesoxtə təlimon pevilo kardə duyəvoje mıəllimon bebəşen, rıxnə ebəğanden bəşmə dılə. Əvon hətto bə həşə bəjen əvoni hıriyə Rəbbi. Ənəhoy dənıbəvarde, jıqo odəmon bəştə sə həlok bəvarden. ² Hətto vey odəmon umjən bəben bəçəvon beəxloğəti bə həğigəti Roy kufr bəkarden. ³ İstə taməkorəti səbəbo de hiləqorə sıxanon şıməni istismor bəkarden. Çəvon hıkm həni hozıye iyən çəvon cəzo bə di dənıbəqıne.

⁴ Oxo Xıdo becəzo nahaştışe qınokorə mələkon, əvoni detosə Hıkmı Ruji oqəteyro cəhənnımı zılmotədə bə zincir jəşe. ⁵ *Əy, xıdonıznə odəmon jiyə bə ğədımə dınyoən ovbarz vığandışe, becəzo nahaştışe, əmma nığo doşe salehəti bəyon kardə Nuhi iyən

*1:14 Yəh.21:18

*1:17-18 Mat.17:1-5; Mark 9:2-7; Lukə 9:28-35

*2:5 Ofə.6:1-7:24

haft kəsi. ^{6*}Əy sutışe Sodom iyən Homorrə şəhron, məhkum kardışe bo viron mandey iyən de jıqoy oməvədə bıə bə xıdonıznə odəmon ibrət doşe. ^{7*}Əmma salehə Luti xılos kardışe. Im odəm ıstə royku beşe insonon beəxloğə jimoniku əzob kəşeydəbe. ⁸Oxo çəvon dılədə jiyə im salehə Lut rujbəruj çəvon beğanunə əməlon vindeədə iyən məseədə iztirob kəşeydəbe. ⁹Həlbətən ki, Rəbb zıneydə mominon çoknə dəvinəo bebəkərdə, nohəxə odəmon isə çoknə obəqəte Hıkmı Ruji bo cəzo doy.

¹⁰In cəzo, xısusən, bəştə cısmoniyə mırdolə ehtirosi əsir eqınıyə, bə hakimiyəton xor diyə kardə bo odəmonə. Jıləvonon behəyo iyən şənbəzin iyən ehtişominə hestemonon təhğir kardeyku tarseydən. ¹¹Əmma çəvonsə ğıvvə iyən ğudrətədə baş bıə mələkon Rəbbi huzurədə ehtişominə hestemonon təhğir əkən, ittıhom nıbəkərdən. ¹²Im odəmon bənə bedərrokə, ğeyri-irodi idorə kardə bıə həyvnononin ki, bo qətey iyən kışteyro bə dınyo omən. Əvon ıstə sənırəsə çiyon təhğir kardeydən. Həyvnonon çoknə kıştə beydənbə, əvonən jəqo kıştə bəben. ¹³İstə kardə nohəxətiyon əvəzi bəsten. Bəruj de eyş-ışrəti mışğol beydənbə, zovq səydən. Əvon şımə arədə bənə mırdolə ləkən iyən noxsanonin. Deşmə harde-peşəme kardeədə ıstə hilonku zovq səydən. ¹⁴Çəvon çəşon de zinokorəti qıleydənbə, qıno kardeyku si beydənbə. Sabitğədəm nıbə odəmon royku bekardeydən. Əvon lənətinə odəmonin, çəvon dilon bə taməkorəti pemujiyə. ^{15*}Bə nohəxə ğəzənci həris bıə Beori zoə Bilami ğəzinə royku beşin, dəqijyeyn. ¹⁶Bilam bəştə kardə qıno qorə ifşo kardə be: bezıvonə həy insoni ğəzinə sıxan kardışe, axməxəti kardeyku oqordınışe im peyğəmbər.

¹⁷Im odəmon bənə beovə honi, vavazi pevılo kardə avonin. Xıdo boəvon oqəteyde toykiyə cəhənnımı. ¹⁸Əvon deştə puçə iyən ğıloşə sıxanon vositə səhvə roədə bıəkəson dılədə bıə zəifə odəmon de cısmoniyə ehtiroson iyən beəxloğəti dəqijneydənbə. ¹⁹Boəvon ozodəti vəd kardeydən, ıstən esə boy çe bevəcə əməlon ğulin. Oxo inson bə çiçi təslim bıbo, çəy ğul beydə. ²⁰Insonon Rəbb iyən Xıloskor bıə İsa Məsihi zıney bəpeştə çe dınyo bevəciətiyonku perəxeydənbə. Qirəm ijənən de həmonə koon mışğol beydənbə, çəvon oxonə vəzyət, sıftənə vəzyətisə betər bəbe. ²¹Çumçıko salehəti Roy zıne bəpeştə, bəvon əmonət kardə bıə mığəddəsə əmronku bə dumo oqardeysə, həniyənbə çok əbi ki, əvon in Roy hiç nızın. ^{22*}Yolon sıxanədə votəbiəyon bəçəvon ıstən sə oməy: «Sıpə obəqərdə ıstə pevardəysə» iyən «xuq dəşandə bey bəpeştə ijən bə silə bəvite».

3

Rəbbi Ruj

¹Azizqıromiyon, esət im çımı bəşmə nıvıştə diminə noməye, bı nomonədə şıməni xəbədə kardeydəm ki, de pokə şınemoni oğo bıbənen. ²Mığəddəsə peyğəmbəron navo

*2:6 Ofə.19:24

*2:7 Ofə.19:1-16

*2:15-16 Aşm.22:4-35

*2:22 Sul.26:11

votə sıxanon iyən çəmə Xıloskor bıə Rəbbi de həvariyon vositə doə əmri bəştə yod vardəniniyon. ³*Har çiy sə bənav ımı zınənişon ki, oxonzəmonədə bəştə ehtiroson qorə hərəkət kardə rıxşandəvoton bomen iyən de rıxşandi ⁴bəvoten: «Kıve Rəbbi vəd kardə zuhur? Oxo çəmə pıəon vəfot kardeyku jıqoşə, ofəyemoni sıftəku har çiy çoknə hestbe, jəqəən mandə». ⁵*Həmonə odəmon ğəsdo yodo be kardəşone ki, de Xıdo kəlomi osmonon ğədimiku jıqoşə mıvcudin, hışkiyən oviku co be iyən de ovi vositə ofəyəy. ⁶*İjənən de ovi, yəni de ovbarzi çə vaxtnə dınyo məhv kardə be. ⁷Esətnə zəmin iyən osmonon de həmonə kəlomi bə otəşi təslim beyro, detosə xıdonıznə odəmon mıhokimə iyən Hikmi Ruji oqətə beydə.

⁸*Azizqiromiyon, ımı ıştə yodo beməkən ki, bo Rəbbi i ruj, bənə i həzo soriye, i həzo sor isə, bənə i rujiye. ⁹Rəbb İştə vədi bə vırə rosneyədə bə di dənıbəqıne, hərçənd kali kəson hisob bıkonən ki, Əv bə di dəqınıyə. Bərəks, bəşmə qorə Əv səbr kardeydə. Oxo Əy piyeydəşni ki, i kəs jıqo həlok bıbu, əmma piyeydəşe ki, har kəs tobə bıkə. ¹⁰*Rəbbi Ruj isə dızdi ğəzinə iberdəmədə bome. Həmon ruji osmonon de yolə qur-quri arəo peqətə bəben. Osmoni cismon bəsuten məhv bəben, həmçinin dınyo iyən bəvədə bıə har əməl ifşo bəbe.

¹¹Har çiy jıqo məhv bəbeysə, şımə çı curə insonon bıəninişon? Mığəddəsə jimon kardəninişon, momin bıəninişon, ¹²vəhalinki şımə Xıdo zuhuri Ruji de intizori çəş kardeydon, keynə osmonon vəş bəqəten, məhv bəben iyən osmoni cismon bəsuten ov bəben. ¹³*Əmma əmə bə Xıdo vədi əsosən tojə osmonon iyən tojə zəmini çəş kardeydəmon, konco ki salehəti səbəso bəbe.

Nəsyəton

¹⁴Bı səbəb, azizqiromiyon, madəm ki imoni bə çəşiyon, pok iyən benoxsan be-be sulhi dılədə jiyeyro dastpoçə bıbən. ¹⁵Rəbbi ın səbri bo xılosi firsət bızınən, çoknə ki bəçəmə azizə boə bə Pauli doə bıə de mudrikəti əy bəşmə nıvıştəşe, ¹⁶əy ıştə həmə nomonədə bı barədə nıvıştəşe. Bı nomonədə çətin sərəsənin bıə kali çiyon hestin; nodonon iyən sabitğədəmnıbə odəmon co Nıvıştəyon təhrif karde ğəzinə, imoniyən təhrif kardeydən, bəştə həlok bey səbəb beydən.

¹⁷De jıqoy ha azizqiromiyon, sıftəku ımı bızınən, bevəcə əməlsoyb bıə odəmonku ıştəni nıço bıkən. Bıdə əvon şıməni bə dast dənığandın, royku benıkən, şımə ıştə ğoymə pobasti qin məkən. ¹⁸İntasi çəmə Rəbb iyən Xıloskor İsa Məsihi lutfədə iyən Əy dərk kardeydə inkişof bıkən. Esət iyən zoləti izzət bıbu Bəy! Amin.

***3:3-4** Yəhd.18

***3:5** Ofə.1:6-9

***3:6** Ofə.7:11-12

***3:8** Zəb.90:4

***3:10** Mat.24:43; Lukə 12:39; 1Sal.5:2; Vəhy 16:15

***3:13** Yeş.65:17; 66:22; Vəhy 21:1